

Enfòmasyon pou lidè ak moun ki angaje nan kominote yo

Trase bon egzanp pou lòt moun wè. Pote chanjman.

Mete pouvwa w ansanm ak pouvwa lòt moun pou nou kore lit pou anpeche vyolans sou fanm e pou bare wout ak VIH/SIDA.

Lidè tankou w —

- pwofesè lekòl • polisye • lidè relijye
- pwofesyonèl ki bay swen sante
- lidè kiltirèl • manm gouvènman • ak lòt lidè

— jwe yon wòl kapital nan lit pou anpeche vyolans sou fanm ak jan sa makonnen ak VIH/SIDA. Ou se yon modèl pou kominote w. Sa w kwè ak jan w konpòte w gen enfluyans sou lòt moun. Ou kapab ranfòse batay pou anpeche vyolans sou fanm ak VIH/SIDA nan pote sipò w bay fanm kou gason, ni aktivis.

Lè w bay sipò w, w ap montre enpòtans pou nou pote kole ak lòt moun nan batay kont doub dezaz sosyal sa a: ki se vyolans sou fanm ak VIH/SIDA ki makonnen ansanm.

Poukisa pou w bay sipò pa w?

Vyolans sou fanm ak VIH/SIDA konn fè yo gade moun mal, ba yo move non pote. Donk, sa mande pou moun tankou w kanpe, pran lapawòl, e pote kole ak moun k ap soufri anba pwoblèm sa yo.

Ki moun ki bezwen sipò w?

Fanm k ap sibi vyolans, oubyen ki genyen VIH/SIDA, konn viv nan lawonte, ak move non kole sou do yo, epi moun meprize yo. Yo bezwen sipò nan men lòt moun pou yo kapab reprann konfyans nan tèt yo e rejwenn diyite yo ak pouvwa ki anndan yo.

Gason k ap eseye ekilibre pouvwa yo egale ak pouvwa fanm k ap viv avèk yo konn jwenn moun gade yo mal e ba yo move non tou, sitou nan men moun ki kwè gason ta dwe kenbe medam yo anba kontwòl. Si w pote sipò w bay gason k ap fè jefò sa yo, w ap kapab ede yo kenbe konviksyon yo ak angajman yo pou viv san vyolans.

Aktivis k ap pran lapawòl sou kesyon vyolans sou fanm ak VIH/SIDA konn jwenn move non tou, paske anpil moun nan kominote a poko fin abitye e aksepte lide aktivis sa yo ap defann nan. Si w pote kole avèk aktivis yo, epi ou menm tou ou tounen yon aktivis, w ap kapab ranfòse jefò yo pou mete plis sekirite ak kè kontan nan tout fwaye e nan kominote a!

Tout moun tout kote bezwen sipò

Ou kapab pote chanjman nan vi pèsònèl ou e ou kapab pote sipò w nan pale ak fanmi w, zanmi w oubyen vwazen w. Ou kapab pote sipò w nan travay ou tou nan pale ak kòlèg ou, kliyan w, moun nan kominote w.

Men kèk bagay ou kapab fè kounye a pou pote sipò w nan kominote w:

- Chache jwenn tout sa w bezwen pou w vin pi byen enfòmè sou kesyon anpeche vyolans sou fanm ak VIH/SIDA, epi pou w vin pi aktif ladan li.
- Pote sipò w bay fanm ou konnen k ap sibi vyolans. Koute yo byen e fè konfyans ak sa yo di w. Fè yo konnen se dwa yo pou yo pa sibi vyolans nan lavi yo. Epi fè yo konnen se pa yo ki lakòz vyolans y ap sibi a.
- Kreye yon lis sèvis k ap disponib pou fanm ki sibi vyolans e fanm ki ta kapab genyen enfeksyon VIH/SIDA. Nan sèvis sa yo, tou mete tretman “72 zè” a, ki anpeche moun pran enfeksyon VIH/SIDA, epi mete klinik sante, sèvis konsèy, epi lis ONG ki okipe fanm. Si pa gen okenn sèvis fòmèl pou pwoteje fanm kont vyolans nan kominote w la, ede fanm yo jwenn sipò nan men fanmi oubyen zanmi yo fè konfyans.
- Pote sipò w bay fanm k ap viv ak VIH/SIDA. Chèche konnen si yo an sekirite lakay yo.
- Chèche jwenn ak gason ki ansanm ak medam yo, travay ak yo pou kreye fwaye ki pi solid e ki gen plis lasante ak kè kontan. Se pou nou youn bay lòt sipò ak ankourajman.
- Kreye rezon pou kore tout gason ki chwazi pa fè vyolans. Ankouraje yo pou yo pote bon chanjman nan rapò yo ak fanm, epi pou yo pataje eksperyans yo ak lòt mesye yo.
- Pote sipò w bay aktivis k ap batay pou anpeche vyolans sou fanm ak VIH/SIDA. Pataje lidè sou kijan nou ka fè sa nan travay nou e nan kominote a.
- Sipòte moun k ap defann kòz pou ta gen plis sèvis lokal pou fanm ki sibi vyolans oubyen ki fè eksperyans VIH/SIDA.
- Chèche jwenn ak òganizasyon, lidè oubyen gwoup moun ki bezwen sipò pou fè plis moun angaje tèt yo nan batay sa a.

Si w bezwen plis ransèyman sou SASA!, kontakte nou: Repanse Pouvwa (509) 3617 1815 • annanpechevyolans@gmail.com • Beyond Borders (011) 202 686 2088 • www.beyondborders.net

Pou vèsyon orijinal SASA! ann Angle: www.raisingvoices.org/sasa

Tèks sa a, se yon adaptasyon vèsyon orijinal SASA! Raising Voices ak ilustrasyon atis Marco Tibasima.

Se yon ekip Repanse Pouvwa/Beyond Borders avèk atis Chevelin Pierre plis grafis EducaVision ki reyalize adaptasyon an pou Ayiti.

SASA!
An n anpeche vyolans sou fanm ak enfeksyon VIH/SIDA